

.....Yang Pembaca Fikir

Rancangan Pembangunan Persekutuan

Apakah benar memberikan nikmat hidup kepada rakyat?

Kalau orang-orang negara-negara lain seperti di Indonesia, India, Pakistan dan Mesir, umpamanya mereka itu kini dikatakan sedang giat melaksanakan rancangan-rancangan pembangunan masyarakat dan negara-negaranya masing-masing dengan pesatnya untuk menuju kepada keadilan dan kemakmuran bagi seluruh rakyatnya, maka di Persekutuan Tanah Melayu pun nampaknya sekarang sedang giat melancarkan rancangan-rancangan dalam dan luar bandarnya yang dikatakan memberikan taraf hidup yang lebih tinggi kepada seluruh rakyatnya, terutama yang diam di kampung-kampung atau desa-desa. Masa ini Rancangan Pertamanya khabarnya telah hampir selesai, dan menurut beritanya pula Rancangan Kedua 1961-1965 yang akan menelan perbelanjaan sebanyak \$1,790,340,000 dan dinamakan “Rancangan Lima Tahun Kedua” akan dimulakan. Setelah itu mungkin yang ketiganya pula akan diadakan nanti, yang demikian dikatakan ialah tugas negara yang sedang membangun dalam segenap lapangan di mana semuanya itu untuk kepentingan dan keperluan masyarakat dan tanah air belaka.

Siapa terdahulu mengecap nikmatnya, rakyat atau kapitalis?

(Oleh: ‘Alimin)

Telah sedia maklum, Persekutuan Tanah Melayu ini baharu sahaja merdeka 4 tahun setelah terjajah dan rosak binasa dalam segenap segi politik, ekonomi, kebudayaan, pelajaran, sosial dan mahu pun cara berfikirnya selama hampir 500 tahun sudah. Masyarakat kita disusun oleh penjajah secara masyarakat yang semata-mata “menguntungkan penjajah”. Maka rasanya atas kerosak binasaan ini yang perlu sekali diperbaiki kembali oleh kita sekarang dengan perhitungan dan

perancangan yang sewajarnya terutamanya mengenai apa yang benar-benar diperlukan oleh golongan rakyat banyak di tanah air kita ini, supaya tidak berlaku seperti kata pepatah: “Pekung yang dihadapi – mata yang diubati”.

Nikmat kepada rakyat:

Kita semua tahu, bahawa dalam kira-kira 7,000,000

rakyat Persekutuan Tanah Melayu ini sekarang, hanya sedikit sahaja yang benar-benar mewah hidupnya, sementara

yang lain itu adalah hidup penuh penderitaan. Mereka ialah dari golongan-golongan petani, nelayan, buruh dan pekebun-pekebun kecil. Tempat kediaman mereka yang terbanyak ialah di kampung-kampung atau di desa-desa dengan keadaan dalam serba kekurangan. Mereka kurang baik mata pencarian, kurang baik kesihatan, kurang baik tempat pelajaran, kurang baik rumah-rumah kediaman dan kurang baik barang-barang makanannya.

Apakah yang kita fikir baik kepada golongan rakyat banyak tersebut, ialah jika dapat pemerintah membantu mereka dengan memberikan tanah-tanah dengan mudah dan murah bayarannya, untuk mereka bercucuk tanam terutamanya barang-barang makanan, menggalakkan dan membantu dalam usaha-usaha ternakan, membantu dalam usaha nelayan dan bermacam-macam lagi yang benar-benar dikehendaki orang-orang di tempat-tempat itu dengan cara yang merata kerana mereka semuanya adalah rakyat yang menderita belaka.

Tak menepati kehendak rakyat:

Memandang dan merasakan bahawa kita satu bangsa yang telah terputus serta tertindas hampir lima kurun lamanya tentulah bangsa kita sekarang menjadi suatu bangsa yang benar-benar berkehendak perbaikan nasib. Jadi mahunya soal inilah yang perlu sekali dipecahkan lebih dahulu sebelum yang lain-lain soal masyarakat. Tetapi setelah kita melihat dan mendapati kepada apa yang telah dilaksanakan pemerintah sekarang dengan menjalankan usaha-usahanya memperbanyak jalan raya, perigi-perigi batu, bangunan-bangunan pejabat, membina tempat-tempat permainan yang besar dan cantik-cantik, memberikan tanah-tanah kepada pemodal-pemodal asing,

memberikan peluang-peluang terbaik dan kemudahan kepada “tengkolok” kapitalis itu, tetapi kepada rakyat banyak?masih lagi boleh dikatakan masih “dalam rancangan-rancangan” belaka sekarang ini. Pada rasanya tidaklah secara melulu jikalau kita sebut yang demikian itu tak menepati kehendak-kehendak rakyat di tanah air kita ini. Sebagai buktinya, dalam masa akhir-akhir ini hal-hal seperti ini sering kita dengar disuarakan oleh rakyat melalui surat-surat khabar dan wakil-wakil mereka terhadap pemerintah dengan menyatakan rasa tidak puas hati dalam usaha-usaha pemerintah menyelenggarakan nasib rakyat seluruhnya. Dan dengan yang demikian akan timbulah pula di hati kita suatu tanda tanya iaitu dengan rancangan pembangunan Persekutuan Tanah Melayu ini apakah benar-benar akan memberikan nikmat hidup kepada rakyat?...dan siapakah yang terdahulu mengecap nikmatnya, rakyat atau kapitalis?...

Rakyat sihat – negara kuat:

Dengan tulisan ini, saya tidak menuduh atau memperkecil usaha pemerintah itu, tetapi hanya untuk menarik perhatian pemerintah dan rakyat seluruhnya agar sama-sama dapat merasakan apa yang sebenarnya “perkara terpenting” setelah kita yakin bahawa kepada seluruh rakyat yang sihat itulah terletak negara yang kuat dan kehidupan yang mewah makmur.

